

河曲縣志卷之八

藝文類

墓表碑志銘

明

苗封翁鳳墓表

苗朝陽

先君諱鳳字來儀別號南莊河曲忠信都人也世居城東苗家溝柏園村余祖塋也先遠不可考七世祖彥成生稼稼生永昌永昌生發發生世用卽陽大父也大父配徐氏生二子長爲先君並潛德不耀先君生於正德六年正月十七日亥時少敦樸業儒不就

棄營家政服田里諸商賈胥役之事絕遠之貽大父以安聞有大
俠善瘡癘先君得其術凡諸危症應手輒落然以濟衆非規秘也
不肖生嘉靖癸卯先君愛護甚稍長出就外傳先君誨教篤俾潛
心舉子業萬厯丙子不肖領鄉薦次年成進士授河南新蔡令尋
遷杞邑先君迎養宦邸惟清慎勤三字提誨不輟不肖因奏最天
子推本家訓封先君如今官然先君每御法服色怡怡下不殊布
素也踰六十以耆德賓邑席者二十年無涉戶外每念曰居身惟
慎天理絕欺僞毋貽室家孫子憂有抑者不俟駕輒白有求其術
者無風雨僻陋畢往也已不肖歷經黃門累改京兆先君以髦弗

能從不肖祿京邸修途旣邁喜懼滋深不肖遂決意請告得旨終
養遂偕四弟日夕左右自辛卯至辛丑蓋十年所也先君性不飲
甚喜人醉慕義種德曰篤不忘每動止罄控如少壯未嘗頽跪也
辛丑冬病履忽倦出壬寅元夕辭賓筵不就猶仗人以行比次月
廿日子時遂奄忽厭世嗚呼痛哉先是令治壽具是夕毋絕膏燃
簡管鑰授不肖無纖悉忘重以存天理教子孫爲訓嗟乎以耄耄
年當阽危際澄神定性戛乎難哉先妣何孺人貞靜敦淑事舅姑
以孝撫子女以慈親疎厚薄具有條理以節儉佐家仍好與樂施
孺民貧者輒德之御臧獲絕不少恩也至不肖令祀時以清白著

誠尤識大體以丙申十二月廿一日午時卒享年八十粵考余先
大父年九十大母八十有七先君年九十有二先妣復得今壽臬
憲楊公顏贈曰一門仁壽非虛語也五男及諸孫諸曾孫並詳碑
陰不肖不文兼深悲痛但存其略以誌孝思云

苗京兆朝陽墓碑

兵部
尙書
高第

苗公諱朝陽字應葵別號慎齋壯齡拾巍科令沃土擢掖垣名諫
議寢登卿貳膺大京兆爵乃解組浩歸逾三十年許以崇禎元年

戊辰三月廿一日巳時卒於正寢越庚午公長子名敏達收淚具

狀越數千里丐第表諸墓第受知門牆遠違函席山頽水壞慨焉

永懷者久之粵惟我師少沈篤不好嬉戲從學多默悟獨抽奧旨

聲名藉甚萬厯丙子鄉薦開勅丁丑進士恂恂無貴倨態除中州

新蔡令調繁知杞考最恩封如例多所興革如辨冤獄魏洪裁冗

賦千餘金改正寄莊冒糧五百餘石條罷河東而行海鹽載在縣

誌口碑行取選授黃門給事陞兵科左右禮科都八年間奉勅巡視京營屬將三十三員甲士一十二萬翕然稱當已丑分校春闈得士潘守正與第等二十一人兩垣條議鑿鑿如開豁宣大拋荒地糧萬餘石首請封藩不避忌諱疏請真儒王公名守仁陳公咨獻章從祀丰裁凜凜特進岡卿改京兆未幾決志告歸杜扉坐斗室自奉儉甚仰事鬢年封君情文周至迨送終盡禮竭力處弟姪事其天性孝友如此居恆不喜干託惟利害關一邑力致當道如包城改革馬頭斗級庫役漁戶等差有功梓里重念風化力舉知縣王環妻閻氏教諭王嘉會妻劉氏何九畏妻苗氏節烈建坊旌

表績纂縣志確當輿情修補大澗河橋石梯險徑金湯要徑利賴
行人無窮當第叨任司馬不肖武弁持千金求轉一刺鄙斥如免
時督撫呂公雅重登拜竟託辭不見歸田三十餘年節經按臺徐
公等七薦不起夫時當奔競公獨恬卧東山洵狂瀾之砥柱哉生
平直方爽邁不解作軟媚語酷嗜圖書所著元白草家訓存笥年
逾八旬聰明矍鑠洎丙寅二月二日夜起暈倒左膀痛不能履越
崇禎戊辰暮春竟不起矣公生於嘉靖二十三年九月十五日酉
時距卒之日享年八十六歲配封李孺人肅雍貞穆聞于歸時提
甕篝燈佐家勤儉俾公得力學旣從宦游益縞綦蔬糲以隆清望

迨榮膺冠帔淡素自若雅稱內助云先於萬曆三十九年五月初四日卒距生於嘉靖二十年正月三十日得年七十一歲合葬平頭梁之原子四女二孫男女及曾孫男女振振詳載碑陰本深末茂積厚流光麟趾鳳毛翩翩鵲起敬銘之爲光裕百代券銘曰

乾坤淑氣 惟公獨凝 靈襟澄湛 勁節嶙峋 鼎開黃甲

宦績馳名 鄉邦禔福 德馨著聞 厥有良配 閭則超倫

佳城鬱鬱 永安先靈 善積流慶 祥發自神 哲嗣崛起

世沐恩綸

王刺史四維墓銘

翰林院
檢討 王 邵

余不文若及泉之文尤怵怵毫舉憚焉惟夫枋蔭比矣好以世締
則有默含未能者誌泰宇王公之役是也公之先世載其令籍河
曲嘉治里高祖景盤曾祖忍咸以隱德聞祖尙義作求愈力生公
父諱純爲邑博弟子員文行兼蔚則祖訓茲也暨生公甫卅角卽
魁岸毅疆聲訇壁水遂以茂才異等上成均名益藉甚旣數奇謁
除主爵爲富平孫公嘉公音貌殊尤請丞其邑公曰官願自樹耳
丞何負余侃侃乎艱貞恒砥或贊令長所不逮邑人德之臺使交
章薦擢令遷安遷蓋自京都至榆關扼要地也寇氛初熾當事者

徵兵號餉赤白羽如織公拮据四年食寢爲輟軍國提之而殘邑之疲乃奔命者亦未睹肘窮殍轉具慶小休善然奏刀才與誠露一斑矣剡者璣錯中丞申公特以守涿士民譁銓衡之堂爭公守者千百計竟移涿而涿又難則璫燄克且徧也當其時獻媚盈方寓公少爲頽仰將立取臺鉉如攜而公則否像不拜孽不迎生祠斥弗建亡何櫻璫怒烈然矯旨削公職索公篋積公身家舉若朝露迺侃侃薑桂百挫不回誠有如臺使之交章纍纍而最著則左蒼嶼李河岑諸公之傲骨儼然山立赤心皎若天開凌空卓品瀛底清操亟宜破格起用以風世道云云也其稱清操則首革年例

三千金後公者猶冀遵勿變焉今聖猷新煥界公治邠公下車卽
豁寃民畢希純等數命覆盆遽暄又以寇烽伊邇日夕修戰守具
一切取給俸薪餘羨城屹而閭無騷邠德之猶夫遷與涿之棠護
碑涕歌來暮繕去思也獨其侃侃傲骨歷久不移則君子許小人
憎茲蓋彼假賊刈良公翼良馘賊以是多忤橫來噴沙苟非憑磨
照炯如公又虎領虩虩矣初服返屋惟餘燐風雨無足蔽公相羊
一經戶以外不一問惟親賢敬上燕後釋先一以樸枕儉共爲本
每樂與隴旁逸叟卜陰暈晴伴篝燈罔懈而趣異則雖狎若冕其
介性若此卓哉公乎生平食澹茹茶爨薤不染匪直芸舍孳孳卽

宦涉諸難與者英讌適總未嘗弋酣蔗境踰繩檢以寸也而子歸然而孫戡然而元雲嶢嶢然積慶聲秩秩然公固以八十爲八千歲者其視嫺逆呈身剝民盜帑以寇翼遺君父憂棄天下萬世之舌誅筆伐者疇能居美俗出亨屯生無穢彰歿則昂其首伸其眉眸迢迢上帝左右而愧怍兩忘髣髴公萬分一歟公真可風也哉公諱四維字爾張號泰宇配封孺人菅氏萱方茂也生子二長必正永平道中軍次心白庠廩生孫男二長燁庠增廣生次浴庠增廣生皆心正出浴爲叔心白過嗣公生於隆慶己巳六月初四日戊時卒於崇禎庚辰六月十九日未時將以崇禎壬午五月十四

日葬於西山白草堰之原爰繫之銘銘曰

河曲之隈帝惟公懷錫公以德福公孔皆挾以經術亮節母訓九
陛知名三方碑馥不容則拂袖懷槐森兮肯構不善惡之善者好
奚增損乎公是徵公之直道以清真矢清白詒奮百世而興百世
也公獲報也雅與公宜

黃封翁廷幹墓誌銘

梅曾亮

古之能教子者多矣至成名則已矣子才且長服官政爲賢大夫而提掖訓誨如嬰兒不使蹉跌此固其親之賢懷襲道義不以無所依而不施亦以其子服習仁義相諭於天性者深故不以亢而無位自嫌其子之賢可思其親之善教其子尤可法也同年友黃惺齋以循吏著於閩中及讀貞菴先生行狀乃知惺齋之爲吏也有本先生諱廷幹字禮卿亦字貞菴先世自臨縣遷河曲曾祖諱金貴祖諱得祿世爲諸生考諱淵泉有德於鄉人稱崑涵先生者也及妣王恭人皆以孫貴贈如其官贈公之得子也晚愛之甚先

生聰穎特達不訓以能入學後親年高遂不事場屋而教子弟後
進甚勤有碩儒爲邑教官身執禮甚恭且命晚學咸造曰必以是
爲經人師無貌承惺齋爲學使賀公所知教以宋五子書近思錄
先生喜命卒業且無應禮部試及以庶吉士改安溪令道遠將改
教職侍親先生不可曰吾樂觀汝爲政邑在泉州萬山中結黨好
訟吏緣爲奸以屍詐富懦者財比延及數十姓先生訓曰視事勤
則時迫而奸無宿成無輕傳事外人則啜汁少而深惡民無所利
每屏後側聽視事有鄭連者殺人而移迹於林姓先生曰是有冤
鄭果伏論如法邑中俗由是大變先生嘗曰官之敗非獨官邪也

四人者共之胥吏僕從官親友也官意未敢如是羣然曰無傷不
幸而敗預擇善地各引去而咎獨叢於官惺齋奉訓惟謹故所蒞
惠而能威先生居署久飲食被服如在鄉邑且曰官錢能辦官事
則幸矣况營私其不足固宜我家素流當不以口體故使子用監
守錢嗟夫人子養其親之心至無窮也不可望於國家設官有常
祿之制爲人親而以供養不足爲憂則無以處夫吏而廉者子以
爲民上而儉其親其名不可一日居也全其子之廉而無歉然於
其親之意非樂道守義之君子不能有是如先生者可以風矣先
生之棄科舉學而養親也以王恭人多病專習醫居喪哀毀過禮

無兄弟事長姊恭兩孤甥皆所成就族親緩急及里黨義舉先衆
勇行不計贏絀病且貧者備藥餌徒步往治之多所全活其一
心利民物家居時亦如是道光十八年正月十二日卒年七十配
李恭人先三歲卒子宅中次子宅仁縣學生女適王適任皆士族
孫秉鐸秉鈞以明年正月葬先生於走馬梁之原以李恭人祔宅
中爲福州同知加知府銜曾亮同年友惺齋也以銘屬固不可辭
銘曰

夫有鬻婦 完之使家 女爲賃陽 振使得夫 言貌愔愔

退然而儒 羣勇所怯 肩義而趨 秉是德心 訐子以謨

子政不瘥 飮於珍模 道風旣徂 卽此幽宅 我真以銘

永保山石

節孝王黃氏墓志銘

黃宅中

太君處士王存賢之妻明涿郡刺史諱四維之六世孫婦余之姑也先祖母生三女次適邑庠生王公諱鑾三適邑庠生任公諱富身姑居長年十九歸王氏克盡婦道生子世旺甫四歲而寡時年方二十有五事姑能孝撫育幼子零丁孤苦至於成立家計拮据克儉克勤及子年登弱冠克有家室方謂王氏有後而母心稍慰也不幸世旺又早卒遺孤續嗣甫五齡兩代孀雌飲冰茹蘗孫枝子子鞠字辛勤嗚呼難哉嘗憶祖母之在世也余以幼沖侍左右見姑歸省時事祖母甚虔祖母病卧牀褥朝夕奉侍滌腠厠煮藥

調羹至於夜不交睫者旬餘久而無倦容逮余稍長嘗過姑家見其治家事精敏周詳知大義約於自奉而豐於待人巾幗有丈夫風焉處妯娌以和閨門肅肅未嘗見有喜怒之色終其身如一日也道光壬午余捷南宮爲庶吉士以京官赴部呈乞

旌表節孝

恩准建坊時姑年屆古稀孫續嗣亦嶄然頭角及余改官赴閩乞假歸里而姑已謝世矣道光六年十二月二十七日卜兆於曲峪村之寨灣子處士先厝於某原卜改葬吉乃遷而合葬焉太君生於乾隆十八年十二月十九日卒於道光三年六月某日享年七十有

一銘曰

竹挺孫枝 雪霜逾茂 食報之昌 惟節與孝 庇茲後人

原卜佳兆 惟百千年 潛光有耀

黃觀察宅中墓志銘

保德州
知州 姚慶布

公諱宅中字惺齋黃氏世居河曲縣舊城以耕讀世其家高祖以下爲邑諸生不樂仕進德行稱於鄉里公祖諱淵泉鄉飲介賓考諱廷幹鄉飲大賓入祀鄉賢祠俱以公貴贈中憲大夫公生於嘉慶元年十二月初一日亥時少穎慧訓善讀書長遊庠受知名公卿嘉慶戊寅舉於鄉道光壬午成進士改庶吉士次年授福建安溪縣知縣調侯官縣升福州府海防同知以憂歸再起補湖南永順府古丈坪同知升貴州大定府知府公以儒術治郡邑爲政詳而不苛所至吏畏民懷

文宗御極擢公爲浙江杭嘉湖兵備道公倦遊乞病歸晚號農莊病叟爲傳自序同治二年十一月初五日子時卒於家年六十有八夫人王恭人長公一歲亦先公一歲卒生子一附貢生秉鐸娶前鳳陽守保德王公榘次女女一適前邵武守青浦陸公我嵩子宗鄭孫男三衡癸衡淑衡淳孫女三曾孫一曾蔭子以同治三年十月十二日合葬公及夫人於走馬梁祖塋之側桐城姚慶布叔父行前大定守諱東之者爲公同年進士誼當爲年家子前年慶布總理中丞英公戎務見公圖線議卽歎爲仁人之言去年來守是邦見公於里第商榷當時事公亶亶不爲其言論丰采粹然尙德之君

子也嗚呼公逝矣公子出先德傳狀及公自著年譜不以余爲不
交請爲墓文余得讀而誌之銘曰

休哉黃氏 孝友世稱 德著於鄉 行聞於廷 及兵備公

彪文縝質 學宗宋儒 壯歲通籍 匪曰能言 而實行之

學道愛人 在心不欺 夙夜勤民 案無留牘 擢二千石

治行第一 內政旣修 外政畢舉 見義勇爲 民胞物與

風清閩海 澤流衡湘 考徵文獻 名載黔陽 詔舉賢才

四登剡牘 近天子光 卅年老宿 皇帝嘉之 畀以監司

分巡西浙 來暮興思 公志澹泊 遂初早賦 出處毅然

毫無瞻顧 歸田著書 名山可藏 農莊之風 山高水長

漢回構覺 禍延秦隴 應詔籌邊 鄉守斯重 公意慨然

安民有術 勸餉募丁 桑梓蒙福 寒暑方周 以勞致病

秉道終身 抱真返性 有懿夫人 飭身約已 佐公清節

誼不爲侈 同穴佳城 高墳磊珂 我銘循吏 以厲媿媿

略

清

李氏世德傳略

黃宅中

李正心唐家會堡人生於明天啟六年長而岐疑爲邑諸生家資頗富崇禎十五年災歉里中貧民乏食正心目擊本堡饑荒願出貲賑濟乃陳縣主捐穀千餘石按戶散給賴以獲全鄉人德之縣宰田公思孔嘉其好義贈以伉爽丈夫四字匾額以表其門生三子長迥次适次送适性姿明慧弱冠遊庠善承父志凡鄉鄰族黨有婚喪之事力不能辦者必周給之修治道路橋梁孜孜不倦興

造岱嶽廟泐碑以垂永久嘗延地師卜地甫出堡行數十步卽止地師勿前憩於路旁者久之已而言曰吾遙望見園中果樹上有數童子偷摘吾家果實吾若至前彼必驚惶恐其墜地致傷是以未敢前行地師拱手曰陰地不如心地有此一片好心何地不吉又何卜耶其誠心愛人方便處事皆此類也適子名行已自幼讀書膂力過人入武庠

國朝康熙戊子科中式武舉己丑會試挑選一等爲兵部差官清選守備李氏之子孫繁衍世德延長固宜表而彰之爲闡聖法且以知爲善之必昌其後也

李處士功立行略

黃宅中

古之君子篤孝友於家庭孚信義於鄉邑推教育於閭里生則垂其品望歿則慕其風徽其素所樹立者然也先生諱功立字銘鼎世居河曲舊城後徙田巨壩村自祖父以下五世同堂

朝廷兩旌其門錫之冠帶綵帛里中榮之先生耕讀爲生兼習岐黃術老而康強卒年八十有七其孫載之茂才乞敘其行略以永其傳余李出也先生於吾舅氏爲兄弟行烏敢以不文辭夫人之稱先生者謂其儒醫濟世療病多奇效尤加意於貧弱之人於此見先生之仁爲人謀事深沈有遠慮衆人縮頸歛手莫敢誰何先生

毅然任之赴湯蹈火有所不顧於此見先生之智且勇而余則謂其有合於君子之道者猶不止此方其家五世同居也食菽三百先生上願親心下撫諸姪伯兄早卒鞠育諸孤視如己子一身支持家計數十餘年內外無間言德配刑于之化能以先生之心爲心舅姑言孝妯娌言和子孫言慈故觀於家而知其有合乎古君子之孝友也

國家中外一統土默特近塞腴田募民耕種輸糧於綏遠廳倉供旗兵口食薩拉齊廳胥役利其出納之費脅令先納薩拉齊廳由廳轉輸綏遠倉民人病之謂輸綏遠則交本色米輸薩拉齊則交折

色錢吏役百方勒措故也先生慨然爭之吏攝以威屢挫不屈卒
遇其奸塞外民賴其庇者二十餘年先生歿而翰綬遠者竟輸薩
拉齊無窮之累墾田者吞聲不敢言至今追憶先生有泣下者故
觀於鄉而知其有合於古君子之信義也嗣子青圃茂才讀書立
品賢舍有聲使天假之年所造正未可量然年未四十秉先生之
教門下生徒執經者舍不能容先生之孫繩武肯堂教授鄉里亦
復如是至今庠序英俊大半出李氏之門故觀於閭里後進而知
其有合於古君子之教育也嗚呼余爲兒時隨吾母往來外家外
大母王太孺人猶在堂白髮婆娑戲弄其側及余成童外大母見

背而吾舅亦旋棄世我母哭母哭兄往往致疾青圃兄之亡也先
大夫哭之痛至今思之肝腸欲斷余昔與載之同受學郝砥峰師
門共硯切磋先生出入學舍見諸生課藝不佳援筆立就脫稿後
命余鈔錄迄今猶能成誦迨余宦遊歸省拜舅氏之墓宿草淒然
猶幸先生耄年康健外家之典型尙在詎意靈光歸然一旦推謝
藥藥棘人竟抱終天之恨然則今日之臨文哽咽者豈獨爲先生
也哉青圃名遇春嘉慶十七年卒載之名承厚俱以諸生世其家

張上舍德潛行略

貢生 魯大中

公諱德潛以太學生舉鄉飲介賓父登雲臨財不苟而好善樂施嘗結筏販糧持籌者失於記數多量粟數十石店中人不知也以贏數歸之人稱爲長者親黨貧乏者解衣推食貧而死者施棺以葬族人乏嗣未娶者爲娶婦生子卒年五十四諳諳以爲善勗諸子而公爲長公之光大前業勉力爲善者體親心也公孝友成性父卒時仲弟德新甫十齡季弟方在襁褓公事孀親撫諸弟家庭雍洩若忘其爲孤寡也後兩弟長成孫曾林立五世一堂則爲立教孝堂明勸賞以激勵子孫公善殖財爲兩弟營造居屋雖一瓦

之覆一器之需無不經理周詳與人交務全信義河岸路險仄行
旅病之獨任興修費雖多不惜生平慷慨好義多類此年七十有
一無疾而終易簣時神氣清明勗子孫務本勿尙浮奢且曰有違
治命卽不孝也嗚呼公未嘗學問本孝友以爲一家之政廣慈惠
以敦一邑之風而又了然生死知釋氏之幻妄不囿於流俗豈非
豪傑之士歟公長子鑑仲弟之子鉞俱邑諸生秉公之教而又加
以學問其所造詎可量哉

蒙古紀略

黃宅中

明史載韃靼卽蒙古故元後也洪武元年大將軍徐達帥師取元元主自北平遁出塞外其將王保保爲邊患六年元兵入犯徐達等大破王保保兵於懷柔時元兵先後犯白登保德河曲輒爲守將所敗十一年夏故元太子愛猷識理達臘卒子脫古思帖木兒繼立擁衆於應昌和林時出沒塞下太祖屢賜璽書諭之不從自脫古思帖木兒後部帥紛拏五傳至坤帖木兒咸被弒不復知帝號有鬼力赤者篡立稱可汗去國號遂稱韃靼云久之阿魯台殺鬼力赤而立本雅失里爲可汗成祖二十二年阿魯台盜邊帝親

征師次蘭答納木兒河阿魯台遁車駕還崩於榆木川未幾阿魯台使來貢馬仁宗登極詔納之自是歲修職貢脫脫不花者故元後韃靼長也亓剌脫懽擊殺阿魯台欲自立爲可汗衆不可乃立脫脫不花自爲丞相脫懽死子也先嗣益桀驁自雄宣德十四年秋也先謀大舉入寇脫脫不花止之曰吾儕服食多資大明何忍爲此也先不聽曰可汗不爲吾當自爲遂擁衆從大同入帝親往征之駕至土木陷焉明年景皇帝卽位尊帝爲太上皇秋上皇歸脫脫不花妻也先姊也生子也先欲立之不從也先疑其與中國通將殺已遂殺脫脫不花收其妻子孳畜給鄯都部屬而自立爲可

并時景皇帝二年也未幾爲所部阿剌知院所殺韃靼部長孛來復攻破阿剌求脫脫不花子立之號小王子景泰六年遣使入貢天順五年寇入平虜城成化元年冬復大入未幾渡河曲圍黃甫川堡官軍力戰乃引去始韃靼之來也或在遼東宣府大同或在甯夏莊浪甘肅去來無常爲患不久景泰初始犯延慶然部落少不敢深入天順間有阿羅出者率屬潛入河套居之遂逼近西邊河套古朔方郡唐張仁愿築三受降城處也地在黃河南自甯夏至偏頭關延袤二千里饒水草外爲東勝衛東勝而外土平衍敵來一騎不能隱明初守之後以曠絕內徙至是孛來與小王子毛

里孩等先後繼至擄中國人爲鄉導抄掠延綏無虛時而邊事以棘嘉靖十一年小王子乞通貢未得命怒遂擁衆十萬騎入寇時小王子最富強多畜貨貝稍厭兵乃徙幕東方稱土蠻分諸部落在西北邊者甚衆曰吉囊曰俺答者於小王子爲從父行據河套雄黠喜兵爲諸部長相率躡諸邊十二年吉囊擁衆屯套內二十二年俺荅遣使石天爵求貢大同巡撫龍大有誘縛之上於朝詭言用計擒獲帝悅擢大有兵部侍郎邊臣升賞者數十人礫天爵於市敵怒入寇掠朔州抵廣武由太原南下沁汾襄垣長子皆被殘復從忻崞代而北屯祁縣叅將張世忠戰死敵遂從雁門故道

去秋復入朔州吉囊死諸子狼白吉等散處河西勢既分俺答獨
盛歲數擾邊總督三邊侍郎曾銑議復河套大學士夏言主之帝
方嚮用言命銑圖上方略以便宜從事銑鳩兵繕塞輒破敵旣而
帝意中變言與銑竟得罪斬西市敵益蓄忿思送廷臣不敢言復
套事矣二十九年諸部大舉抵通州分兵四掠畿甸大震大同總
兵咸甯侯仇鸞以勤王兵至輒懦不敢戰乃議開馬市以申敵兵
部郎中楊繼盛上疏爭之不得明年春以侍郎史道蒞其事給白
金十萬開市大同叛人蕭芹呂明鎮者故以罪亡入敵挾白蓮邪
教與其黨趙全邱富周原諸人導俺答爲患俺答市畢旋入掠復

請以牛馬易粟豆求職役詔敕又潛約河西都部內犯墮諸邊帝惡之詔罷馬市自是敵日寇掠西邊邊人大困三十三年秋攻薊鎮百道並進警報日數十至京師戒嚴總督楊博悉力拒守募死士夜砍其營敵驚擾乃遁朝廷下賞格購俺答首賜萬金魯伯獲邱富周原者三百金授三品武階時富等在敵招集亡命居豐州築城自衛構宮殿墾水田號曰板升板升華言屋也趙全教敵益習攻戰事俺答愛之甚每入寇必置酒全所問計邱富死趙全在敵中益用事尊俺答爲帝治宮殿期日上棟忽大風棟墜傷數人俺答懼不敢居隆慶元年俺答數犯山西入井坪朔州老營偏頭

關諸處邊將不能禦遂長驅攻岢嵐及汾州破石州殺解州王亮
采屠其民復大掠孝義介休平遙文水交城太谷隰州聞男女死
者數萬俺答有孫曰把漢那吉者俺答第三子鐵背台吉子也幼
孤育於俺答妻所既長娶婦比吉把漢復聘襖兒都司女卽俺答
外孫女貌美俺答奪之把漢恚遂率其屬阿力哥等十人來降太
同巡撫方逢時總督王崇古上言把漢來歸宜給官爵豐館餼飾
輿馬以招俺答詔可授把漢指揮使遣譯者往言朝廷待把漢甚
厚第能縛板升諸叛人趙全等且送至把漢卽夕返矣俺答大喜
請輸馬與中國鐵鍋布帛互市隨執趙全等數人來獻崇古乃以

帝命遣把漢歸因上言朝廷若允俺答封貢諸邊有數年之安可
乘時修備設敵背盟以數年蓄養之財力從事戰守愈於終歲矣
命帝從之立互市約開市日來者以三百人駐邊外我兵五百駐
市場期盡一月番以金銀牛馬皮張馬尾等物商販以緞紬布匹
釜鍋等物山西市場立於水泉營邊外封俺答爲順義王十年春
俺答死封其子黃台吉爲順義王越三年亦死十五年春子摺力
克嗣其妻三娘子故俺答所奪之外孫女而爲婦者也厯配三王
主兵柄爲中國守邊保塞衆畏服之乃封爲忠順夫人自宣大至
甘肅不用兵者二十年摺力克死未有嗣忠順夫人率所部仍效

貢職虎墩兔者居插漢兒地亦曰插漢兒王子元裔也崇禎元年
犯宣大塞秋帝御平臺召總督王象乾問方略對言不如撫而用
之因定歲予插漢金八萬一千兩以示羈縻明年秋虎復擁衆至
延綏紅水灘乞增賞未遂縱掠塞外已而爲我

大清兵所擊六年盡驅部衆渡河遠遁是時韃靼諸部先後歸附明年
大清兵遂大會諸部於兀蘇河南岡頒軍律焉而虎已卒乃追至上都
城俘其部衆其後套部歲入甯夏甘涼境巡撫陳奇瑜等輒擊敗
之套部干兒罵亦爲總兵尤世祿所斬迄明世邊陲無甯致中原
盜賊蜂起當事者徂與俺答等貢市之便見插漢之恣於東也謂

海國集卷八
歲捐金錢數十萬冀苟安且夕且冀收之爲用而卒不得其後諸部皆折入

大清國計愈困邊事愈棘朝議愈紛明亦遂不可爲矣

國朝龍興蒙古科爾沁部率先歸附及噶喇哈爾諸部相繼並降於是悉遵約束從征伐

世祖定鼎錫爵世及如古封建其貢道有五曰獨石口張家口古北口喜峰口殺虎口口外四十九旗皆曰內藩蒙古合歸化城土默特二旗計之合五十一旗爲部二十有五皆在漠南聽我

朝設札薩克總理旗務此內蒙古也又有外蒙古分西路北路中路

東路四部凡四汗其汗以下有親王郡王貝勒貝子公台吉等共八十一旗自設札薩克俱在漠北總稱喀爾喀此新藩外蒙古也由正北迤西曰準部卽天山北路由西北迤西南卽天山南路皆回子境準回二部皆古西域地也

大清國之北境東起鴨綠江黑龍江逾兩蒙古西訖準部袤二萬餘里皆接俄羅斯界故俄羅斯爲北徼極大之邦其水流入北海視北斗則在南矣內蒙古歸附最先而喀爾喀外蒙古則康熙中爲準噶爾破逐款塞內附

聖祖親巡塞外受其朝貢復親征噶爾丹埽平漠北而返之於故地設定

左副將軍一參贊大臣一以鎮撫之凡兩蒙古之君長皆隸理藩院世其爵祿通其婚姻時其朝貢制其等威定其牧地均其互市內宿衛禁廷外捍禦要荒縱橫萬餘里臣妾百餘旗蓋曠古所未有也因邑志列牌外牌內蒙古圖故備考蒙古原委俾覽者知之

西北邊略

武生
白夢鑑

夫緩者宜圖之以法急者當備之以嚴此北邊之防修在所緩歸化之添設在所急也昔朝邊患史冊亦載其略蓋以勞民傷財之累守禦征伐之害言之冗煩筆墨難罄然細推其由總因漢人蒙古敵國而已既爲敵國安得不防是以爲君者拊髀而思良將爲臣者彈指而憂邊警遷戍四方以固邊陲父子訣別夫妻分離而且一人行征十家資奉居者有餽送之苦行者有鋒刃之憂去留騷然閭里不靖幸自我

朝中外被化萬國一家漢人蒙古翕然交歡農夫耕其地商賈易其

物目覩姻婭之好耳聞誦讀之音此誠千古所未見也區區一邊何足掛齒在昔稱爲長城萬里之險者在今視爲荒壁土牆而已故自

國初至今安享太平將及百年邊之傾頽匪伊朝夕是官民不知有邊矣汎兵止查禁物往來之人顧而弗問是將卒不知有邊矣蒙古以有易無出入自便是蒙古不知有邊矣夫官民不知有邊將卒不知有邊不足奇也至於蒙古亦竟不知有邊則古稱不識不知忘帝力於何有者又何足異乎猗歟休哉凡我同人亦何幸而生於今時哉乃數年以來屢次查閱議防議修此雖未雨綢繆之

意難免蒙古疑畏之心損恐有矣益將安在卽云治不忘亂安不
忘危亦當反復叅考何朝防邊而治何朝不防而亂何代修之則
安何代不修則危況今不防修旣如此昔朝防修又如彼孰得孰
失較若列眉何利何害罔或有忒且生聞李勣守太原太宗云朕
之長城也又聞檀道濟自負爲長城萬里之才伐魏而奏績者數
矣從未聞恃一土牆之隔而卽可以久安長治也是知言之於昔
頗有輕重議之於今恐未盡善故曰北邊之防修在所緩也歸化
城在北邊之外黃河之東古稱鄠州地也其人五帝不能臣三王
不能制以秦始皇之強蒙恬之威帶甲四十餘萬猶不敢窺西河

乃築長城以界之漢之高祖初興三十萬衆困於平城斯時奇謀之士甚多碩畫之臣不少而卒其所以脫者不忍言也其他又何足論乎惟至我

朝俯首歸誠傾心向化歸化二字想亦因此而命名也其地坦腴沃著一河漩繞其山凌霄插漢萬木叢生其蒙古部落相聯河西山後綿綿不絕其漢人商賈東西朔南日日益增今已有御史二臺等官經制其中良民各安生理強梁漸次斂跡雖未全美亦有可觀徐徐整飭誰云晚耶惟是西事尙未埽平小醜猶然作梗此處乃糧饟往還之要道蒙古出入之通衢日久生奸猾情難測假使

百計煽惑暗結黨援奔鯨觸羅則恐倉卒難制遣發討除又慮坐失機宜是以罄陳狂愚無所避諱者亦犬馬感恩思効之誠惓惓而不能自己者也似當於山前河後添設重鎮以扼其要或滿或

漢委才能以總其任凡屬衝要之處必分設弁員嚴飭汛卒詳搜硝磺省察奸詐再令沿邊副叅遊守等官公文往來相通遣調亦聽節制隱作犄角之勢迭爲脣齒之形舉一而兼數利固此而復衛彼經久之圖端不外是或有議之者曰設一鎮必有一鎮之費添一兵卽需一兵之饗此乃三家村中之言也抑知天下無不可行之法而患立法之未善亦無不可立之法而患行法之無人嘗

考趙充國屯田金城內無虛費之虞外有守禦之備有警荷戈無事負鍤投石超乘之雄卽是出作入息之侶量晴較雨之輩便爲橫戈躍馬之儁今誠得實心任事之人用之此地則綽綽有餘行之此時亦易如反掌非惟無損其益甚多此息費養兵之一法也且太平日久生齒日繁河之東西草地儼然小民恒產統而計之數萬有餘今歷年耕種而民心未安者其蒙古難免鼠盜狗偷之弊漢人不無橫行強占之徒蓋定規未立而專司無人之故也若復設賢能之員實心經理庶善懲奸嚴飭蒙古隊目肅遵王章勿蹈前轍再酌每俱之內應當納銀若干或宜輸米幾何一懸良法

萬物歡心小民雖愚爲已甚習孰不知設兵爲我我應若兵而循分樂輸之誠急公恐後之效可立見於目前矣此利民養兵之一法也總而論之卽動

帑金何爲妄費哉設備嚴而中外有永固之利經制善而兵民勝長城之威何憂乎煽惑何憂乎黨援何慮乎奔鯨觸羅坐失機宜也耶故曰歸化城之添設在所急也

金邑侯教養紀略

王 衡

牧民者難言教養矣而有不易言者土地之肥磽歲時之豐歉生財之衆寡習俗之儉奢爲利爲弊爲休爲戚不善所養有便民而反以擾民者矣國風之美惡民氣之剛柔士品之隆汙人心之趨避爲良爲莠爲從爲違不善其教有齊民而適以病民者矣而又獄訟以縈其慮催科以繫其神甚則承平已久烽燧忽驚韜略未嫻軍旅孔亟當斯時也處斯地也古所稱百里大國民煩事劇者萃兵刑錢穀而任之一身且合常變經權而處之有道此非讀書有經濟通識者不能非歷仕有淵源家學者亦不能也若我邑父

母 金公者宦族奇才躬膺民社所熟諳者古今得失之原簡不
屑求工於章句所習見者政俗異同之故而總期有濟於黎元同
好惡於四民惠以爲政嚴取與於一介儉以養廉寬猛而措之以
時清勤而持之以慎則既有以握其本而善其施矣第河邑界逼
黃流山童地僻近年多故教養尤難 公則曰是不可以緩緩則
積懈成弛事皆廢而不興是尤不可以急急則因難生畏志甫動
而輒沮無已其次第而徐行之庶有濟乎城垣者保障所由恃其
屢修中止者非盡經費之不貲也 公首捐廉俸以倡紳庶舊者
新焉缺者補焉若雉堞若魁樓若戍樓若內外門若月城馬道尚

所未具者今則登崇墉而巍然並峙矣而又念壇壝之設事神庇民埽地不足以明虔也乃相其陰陽豎之神道俾民之經南北而過者時致敬禮焉而又慮邊城之廢年遠日深無事任其往來有事難以守禦是亦有司之責也於是審形度勢內則缺陷有必完出入可資譏察外則濠梁有必固宵小不敢覬覦如是而民得安於隴畝矣

文廟者聲教所由施其數典或遺者非盡經理之無具也 公首捐廉俸以倡士民舊者新焉缺者補焉若名宦祠若鄉賢祠若泮池若

文昌三代殿若歲祀

先師八月誕辰向所未備者今則仰宮牆而煥然改觀矣而又思書院之設養士育才廣廈斯足以有容也乃展其基址修其牆屋俾士之由遠近而來者羣居樂業焉而又計邊方之民貧多富少幼學既艱於脩膳遊庠復累於從公是亦有司所宜恤也於是設法勸輸一則創興義學爲延師以課子弟一則籌備棚費爲生息以待寒微如是而士得安於几席矣其寓教養於獄訟中也適輕適重洞悉民情而一出以哀矜之念若案牘之留滯詞證之株連親友僕從之因公爲蠹皆公所嚴禁而不容者也其推教養於催科外也役夫役馬借資民力而一均以公慎之心若吏胥之需索鄉

保之苛求悍族刁民之藉端滋擾皆公所預懲而不貸者也此
其措施有條從容展布猶在士民意計間而撓其教養之術使不
得行分其教養之心使不得遂者則尤在團防一事何者以久安
長治之區而忽值鄰氛不靖以邊塞咽喉之地而驚聞賊勢方張
軍書絡繹而來差務紛紜而集久練則恐妨民事供給則恐傷民
財不爲預備既恐無以庇民生過爲張皇又恐因以亂民志而
公獨有膽有識處以鎮靜出以安詳度支悉委紳衿凡事俱量爲
撙節防守必居險要無時不親自拊循自陝省神邑失事以來每
遇河冰凍結騷動紛如賊踪之出沒不時兵卒之差留無定焦勞

日夜如有疾者之危而復安亦已屢矣而猶能處變如常深謀遠慮苟有裨地方有關文教者隨時隨事莫不留心一旦邊境無虞風移俗化興利祛弊休戚同之除莠安良從違決之我公之仁心仁政所溥施於吾邑者尙有窮期哉夫大人種德於一方卽所以貽謀於數世簪纓繼美不殊王謝家風著作有林奚讓燕許手筆掇巍科於桂子三鳳齊名鍾異質於蘭孫八龍稱最而公以一身承先啟後丕著循聲行見膺厚秩享遐齡極人世之榮敘天倫之樂所謂有大德者其位其祿其名其壽胥歸之是則天心所默眷而亦都人士私心之所樂祝也爰作俚歌而頌之曰君子儲

大器抗懷早有民物志君子爲名臣不願官高願親民我觀今世
讀書者纔說科名便心寫又聞世家好官聲練達人情與宦情詎
知教養作父母此道不行由來久我邦之人亦何幸天祐我公
來此守地僻民貧多事秋乃能大展經綸手邊城保障文教敷次
第而行夫豈偶催科不擾獄訟平此心惟恐斯民負普將霖雨濟
民生美政嘖嘖碑在口卓哉蜀文翁邈矣潁川風古來循吏今見
公民心頌禱天心通此理不爽此心同願公世世移孝以作

忠

議

清

團練議

章程附

黃宅中

從來防外必先安內內患不生斯外患可防故辦理團防要以安人心爲本卽據河曲言之城內練勇照常操演並未稍懈各團人數已有成規第所慮者練勇口糧經費不足耳現在捐集各行制錢三千零六十串勢難再捐今已用過一千三百四串以後撙節用之僅敷半年與其支絀於後因經費不足而廢於半途何若節省於先使經費稍充而可期長遠竊思團練二字分而言之爲二

合而言之爲一有事則團抽爲練優給口糧以鼓民勇無事則練歸於團酌減浮費以惜民貲團民可聚而亦可散練勇貴精而不貴多團民分布各鄉聯絡猶易練勇聚在一處約束頗難團防初辦之時固必張其聲勢團防已定之後尤必計其久長以現在情勢酌之縣城練勇一百五十名似宜汰其庸弱去其驕惰隨時酌減如鼓吹人等一切浮費儘可裁罷如此則練一丁有一丁之實用減一丁省一丁之虛糜以後卽有不給再籌捐助民氣稍紓則民心不怨此根本之計也

章程十五條

一團練總局延派紳士老成端謹者總理局事家道殷實者經營出入用項敏於翰墨嫻於書算者登記數簿別選熟習團練一人專管練勇隨時操演所有在局紳士俱不開銷火食惟指授練勇之教師月給工資

一局中辦事之人如有始勤終怠或因事外出或借故推諉間或干預衙門詞訟致招物議者請官撤退正本清源必自局中始也若辦事實心始終勤奮者俟事竣後由地方官查明分別詳請獎勵

一操演練丁技藝分上中下三等其尤出衆者拔爲超勇每日給

口糧錢百文以示鼓勵上勇日給錢八十文中勇日給錢七十文次勇日給錢五十文庸弱驕惰不聽約束者次之以免冒濫正月間招集百二十名後又增三十名至五月以後減爲八十名每月逢十日官出教場看操逢五日紳士看操按期操演隨時整頓庶不致於鬆懈

一招集練勇聚在一處必使聚而能散方無後災現在申明約束於百五十人中選留技藝熟嫻者八十名隨時校閱如有續行裁汰者團長稟官酌核辦理黜陟之中勸懲行焉咸豐三年保德州城內團練一百五十人後因經費不足幾至生變省中委員來州

查辦其事始定此乃紳士辦理不善所致故必始事而不擾終事而相安可聚可散斯爲措置有方

一初辦團練火器最爲緊要募匠打造鳥鎗四十桿先發給縣城練丁演習又添造五桿發交舊城練丁演試半年俱堪適用現在遵照撫憲諭飭赴省局請領擡鎗等件如蒙頒發分給營團則冬月防河更爲得力

一局中製備器械大小旗幟二十四桿練勇號衣號帽各一百件刀矛各五十件籐牌二十件銅鑼十一面銑鼓一件均存總局用時給發既用之後查點收存至團民號掛於會哨之日團長帶往

分別給發事竣點收民團器械另單開明

一上下河要路民團共計一千六百八十名十里長灘一百八十八名已將人數稟報分別造冊存案惟各團按戶出丁團而未練以後委員查驗必須由縣飭役責一諭帖先期傳知以免遲悞至農忙之月酌量少傳人數以示體恤

一縣城近河民團凡窩舖房租薪炭燈油及更夫飯食係各團民戶另行捐辦自同治元年十月初一日起每月應需錢一百八十餘千本年四月以後併兩團爲一團每月亦需錢百千此皆民戶自行捐給不在行商捐數之內

一所捐各行舖戶制錢三千零六十串署中司其入數局中司其出數按月支發開列長單一在總局張貼一送署中查核以現在酌減練丁之數計之支發口糧可至九十月間冬月大河冰合處處宜防加增練丁預籌經費不能再向各行續捐止就民戶殷實者量力捐貲捍衛桑梓卽是保護身家稍知大義諒必樂從

一沿河各村堡設立民團或按戶出丁或按田出粟所有經費各自籌畫分別等差均勻搭配擇各團之明白曉事稍有衣食者派爲團長地方官加以禮貌俾其勸諭富者出貲貧者出力處事公平則爭端不生緩急相通守望相助或有頑獷不遵素行無賴者

稟官懲治

一舊城烟戶止百餘家家出一人以孝友睦嫻任恤六字分作六牌每牌十人輪日巡查附以近城村民共足一團百二十人之數自冬十一月朔日起巡廳及城守營帶領弓兵夜間督巡三月以後酌減六牌人數照常巡更所有更夫薪炭燈油雜費衆戶共捐無庸開銷總局公費

一會哨之費春間有一次用錢至二十千零者其後多寡不等現在局中議定嗣後北至關河口會哨縣城團長帶練勇二十名隨同文武官弁率領該處防兵酌調附近團民往返三日天橋會哨

舊城團長帶練勇十名隨同城守營率領火山防兵酌調附近團民往返一日勞費俱省此擷節經費之一端也

一榆林探報每月給探子口糧銀六兩折發錢十一千有零以後議定在練丁內輪流撥派擇年力強壯行走捷健者計日加給工食守取確信銷差聲息通而往來較速奔走慣而險阻備嘗既可節省經費又可練習團丁兩有益也

一河曲陽沔官渡爲陝西府谷縣黃甫川往來必經之岸口陽沔以下二十里有沙窩私渡應行嚴禁去冬本縣移知府谷縣將渡船撤去今春本州復行移會又函商河保營參戎於陽沔防兵六

十名內撥派二十名在火山一帶往來巡緝札飭舊縣城守營鈐
東可無偷渡之弊至於陽沔官渡駐兵防守盤詰形跡可疑之人
帶兵官約束稽查俱爲安靜至秋收後口外雜糧由黃甫川轉運
渡河例不禁止黃甫西岸之糧食船載而東火山東岸之煤炭船
載而西河曲之民食有資府谷之燒煤不缺往來搬運俱係本地
熟識之人不得借盤詰爲名致滋索擾

一奉頒發勸辦捐輸防費章程捐有成數自應由地方官卽行報
解以爲通省公用惟是河保瘠苦地方銀錢缺乏本境團練冬月
費用尤多已稟懇撫憲俯念僻壤窮鄉又爲邊防要地不可以通

省概論請暫緩捐如允所請上憲於有司寬一分督責則州縣於
百姓寬一分徵求但使邊民不擾邊圉甯安無意外之虞則省意
外之費人心安而民氣靖內患不生外患可防矣

諭

清

勸民種樹諭

曹春曉

恭讀雍正二年

上諭舍旁田畔及荒山不可耕耘之處度量土宜種植樹木其令有司勸課等因欽此又乾隆七年

上諭如果園圃虞衡數牧之藏以次修舉於民生日用不無裨益國家生齒日繁凡資生養贍之源不可不爲急講等因欽此

天語垂訓爲民生計者至周至切凡我臣民謹當遵行勿怠也昔鄭渾爲

山陽魏郡太守百姓苦乏材木乃令民間樹榆爲籬並益五果榆皆成籬五果豐實民用遂饒是樹植之益昔有成效河邑山多土瘠栽種樹木可以佐耕耘之所不及近闕沿河一帶多植楊柳榆棗及桃杏海紅大果等樹林木長成歲獲其利是樹植之成效尤昭然共見矣若爾村落居民或嶺脚山陂或田頭地角凡不可耕作之處悉行栽植審土性之所宜勤加培護鄉鄰互相戒約毋得砍伐損傷十年之計樹木百里之地成林唐風之詩曰山有樞櫟有榆不猶是古風歟况杏子榆皮取食可備荒年柳枝槐木其材可作器用爾居民素稱勤儉亦何憚而不爲哉爲此出示勸導並

飭鄉保挨戶傳諭各宜遵照毋違此諭

大墩梁官荒地畝歸入 文廟作河陰書院經費論

道光二十三年

月

保德州
知州 莫兆文

諭河陰書院董事張一清等知悉照得該縣興復書院有如平地
爲山兼以年歉民貧經費未易籌畫若僅歛資於捐助而不借力
於公田非第債事中途且恐難垂永久茲查該縣民人賀廷芳上
控李調元爭佔地畝一案前經本州提齊人卷查閱地圖以及各
呈契照并應完糧銀核與所爭之地段落四至毫不相符顯有影
射侵佔等弊迨逐細查訊澈底根追始知控爭之地歷係官荒地
造原無糧銀契據因此地西與賀廷芳所呈祖遺明代執照蒿地

毘連北與李調元所執祖遺頂認代完絕戶高留兒名下地畝接壤維時李調元之祖垂涎官荒潛圖侵墾隨將已賣高留兒地內所遺糧銀藉爲此地原有賦稅於是肆行霸佔據爲已有賀廷芳稔知其弊憶及已地亦與官荒地界毘連起意影射遂將所執毘連之蒿地明代執照影射侵佔由是兩相爭奪歷控不休迨本州訊悉前情破其詭弊兩造均俯首無辭查官荒地畝現固非盡膏腴然亦不難開墾以獲地利因思該縣書院經費無資特將此地斷歸

文廟以作書院經費並飭據河曲縣勘丈此地共有三十頃七十畝早

經裁立界石四至點交董事張一清等管業雖案尙未結而無主之地既斷充公自應先給諭帖俾有典守除行河曲縣知照并候詳明撫憲奉批後再飭該縣遵批立案外合行飭發爲此諭仰董事張一清等知悉自諭之後該生等卽速查照河曲縣勘明界至畝數經理承業務須一律開墾按地升科以作書院經費倘李賀兩姓人等再敢撓阻卽赴該縣稟究各宜遵照毋違特諭

勸民毋種罌粟諭

同治十一年三月

金福增

照得五穀爲養民之源罌粟實殺人之物

國家於西洋藥料抽收釐稅接濟饑需不准本地私栽祇許商賈外

販誠恐徧種罌粟五穀不生非僅風俗澆漓而饑饉之由卽在於

此所關非細故也歷年以來疊蒙上憲札飭嚴禁栽種並頒發告

示張貼各在案本縣請詣勸諭業經三令五申乃爾民忘返本圖

止貪弋利種良田以爲莖變嘉禾爲白砒僉謂罌粟禾收麻苗已

出旣無妨於稼穡又可逐夫錐刀獲利較多奚啻倍蓰殊不知財

利之數宜以漸至毋取逆來逆來者無常漸至者可久悖入悖出

古今大抵皆然卽以他事譬之暴客劫掠貨財頃刻之間富難億計其來可謂速矣而謂其可久乎此爾民所習知也今罌粟之栽獲利亦等於暴客而其利已殺人之事更爲過之何者暴客猶有時得財而不傷人種罌粟者得財則無不傷人暴客之得財傷人猶必視貧富種罌粟者之得財傷人則不論貧富爾民試自思之倍蓰之獲其可久耶其不可久耶不直此也不種罌粟之家尙必買而吸食旣種罌粟則取攜良便無費囊費老成者卽能力持而子弟未有不吸成大癮者且河邑惡習婦女一經口角遠爾輕生不出戶庭卽有酖毒暗中吞食防弗勝防况吸烟者精液乾枯頹

於子嗣是非特殺一人並殺其子弟殺其婦女殺其孫曾且并全家而殺之矣絕滅之禍可畏也亦可哀也今有人於此赤爾族滅爾門取爾貲財傾爾家產斬爾祖宗之血食絕爾嗣續之根株爾民死而有靈亦當切齒獨奈何以殺人之物種之於地藏之於家獲利幾何而竟喪心昧良至於此極耶又况徧種罌粟則五穀不生五穀不生則饑饉游臻盜賊充斥爾民卽欲安堵無恙共享太平其可得乎爲此勸諭爾民其吸食洋烟者固當及早回頭自尋生路其栽種罌粟者尤宜淨除萌蘖纖悉無留庶幾時和年豐同登壽宇耕食鑿飲咸納福林不負本縣一片婆心誦誥勸諭焉特

諭

詳文

清

籌備考棚經費發當生息詳文

同治八年

金福增

爲籌備考棚經費發當生息詳請立案事案查阜縣每屆生童考
試向奉

學憲牌文歲試調赴岢嵐州附考科試調赴甯武府附考所有供
給等項岢嵐州派幫銀三百五十兩甯武府派幫銀一百兩考畢
後由齋長按新生家道分攤歲案每兩折交錢一千文科案每兩
折交錢一千五百文從此出票催收每多遷延觀望經旬累月尙

未繳齊而辦考州縣需用孔殷丁差坐索縣庫又無閒款不得已傳案限追其實在寒微者仍難如數此歷來辦理之情形也卑職蒞任三年先後辦過二次因思考棚經費各縣有之第出自諸生究非善策查自同治二年起以錢照市價易銀尙嵐州移解銀二百兩甯武府批解銀七十兩爰是籌款銀一千兩發交縣城興盛當等六家按年一分生息取有領狀保結附卷存查計三年中可得息銀三百兩每逢寅申巳亥等歲

學憲按臨下馬以前歲試提息銀二百兩科試提息銀七十兩由齋長向行頭支取請縣出具解文赴考時隨帶呈交守候回批備

案餘銀三十兩議歸公正紳士以爲歲修

文廟書院之資每次如何開銷仍著報縣查核嗣後考棚經費先期卽可解交庶辦考州縣常無掣肘之虞而新進生員遂免燃眉之急既足以培士氣亦足以篤寅恭俟奉批後勸諸貞氓以垂永久是
否有當理合具文詳請

憲臺查核示遵爲此備由具申伏乞

照詳施行

同治八年八月二十八日詳九月十八日蒙

本州正堂姚 批查州縣兩屬歲科棚費均係取諸新生本州久

欲勸捐迄無成議據詳甚屬妥善仰卽如詳立案仍候

本道批示繳九月二十九日蒙

署理雁平道馬

批據詳該縣籌備寶銀一千兩發當生息計三

年中可得息銀三百兩以作歲科兩試應需經費尙餘銀三十兩
作爲歲修

文廟書院之資所辦甚屬妥善仰卽如詳辦理并飭勒諸貞珉以垂永
久此繳又於十月初一日抄批稟

太原府二十五日蒙
甯武

署理甯武府正堂張

批據稟籌備歲科兩試考棚經費甚屬妥

善已飭甯武縣查照矣仰卽知照繳十二月初五日蒙

太原府正堂俞 批已據情檄飭尙嵐州遵照矣仰卽知照繳

重建社稷神祇壇詳文

同治八年

金福增

爲重建壇壝詳請立案事案查阜縣向在舊城自乾隆二十九年
前縣劉令日暄移駐河保營並未設有壇壝至道光二十九年周
令啟柏始建

邑厲壇於東關三里許如

社稷

神祇之載在祀典者每逢春秋戊祭出東郊設位成禮歷百餘載而有
祀無壇卑職伏思

祀典所傳不宜久闕亟應捐資創建以妥

神靈惟自到任後防務紛繁不遑顧及茲值城工之暇擇得城東大
教場南北餘地兩處北近於山故高南近於水故下遙遙相對坐
癸向丁其基址各長五弓寬四弓外綴以石中嵌以磚周圍築以
土牆北立二碑曰

社神曰

稷神合建一亭顏其額曰北壇其聯曰民物滋豐繇厚德歲時祈報定
隆儀南立三碑曰

風雲雷雨曰

山川曰

城隍合建一亭顏其額曰南壇其聯曰澤被和甘崇享祀功成奠定
普嘉祥庶

神得所憑依兼可垂諸永久本年三月經始七月告成合將重建壇
壝緣由具文詳請

憲臺查核批示立案再此項工程係官民捐辦請免報銷合併聲
明爲此備由具申伏乞

照詳施行

同治八年七月二十九日詳九月十八日蒙

本州正堂姚 批准如詳立案仰卽知照仍候

各憲批示繳九月十九日蒙

本州帖開九月初四日蒙

署理雁平道馬 批准如詳立案仰保德州轉飭知照仍候

院憲 藩司批示繳九月二十一日蒙

布政使司胡 批如詳立案仰保德州轉飭知照仍候

院憲批示繳又蒙

布政使司胡 劄付八月二十一日蒙

巡撫部院李 批如詳立案仰布政司轉飭知照繳

東西甕城添造卡房詳文

同治十年

金福增

爲詳明縣城上下添造卡房並請立案事案查同治七年閏四月暨十一月間回匪兩次直逼河干意圖東竄卑職飭派團中民勇城上同心守禦城下實力盤查朝夕巡防不敢稍形疎懈惟冬令朔風凜烈天氣較寒支搭帳棚勢難久站卑職隨時稽察日間以城門爲重夜間以堞口爲先目擊情形實有號寒之苦賊氛不滅自應未雨綢繆八年春間督同紳士勸捐籌議城上東南角舊有魁星閣一座西南角舊有火藥庫三間卽在東北西北兩角各添造平房三間其餘四面或兩間或一間共十二處計二十四間每

間可容十餘人均有門窗竈坑工竣後遂加查驗用土全封然既爲城上之謀而城下亦宜顧慮本年卑職復與紳士商議籌款興工遂查南門甕城康熙年間前任已革叅將孟飛熊建造舖房十七間住房十間收取租錢至雍正六年三月卑前縣張令詳蒙

前撫憲石批令確估變價充公遵卽將舖房十七間每間估銀五兩住房十間每間估銀四兩共估銀一百二十五兩造冊具詳嗣於次年七月據縣民王靄等照依估價各立契據當堂分買並將已征未收房租銀一十八兩二錢五分五釐一併存儲縣庫旋因西城牆坍塌壓斃民命無款動修復經張前令將前項房價並

租銀充作修城工費亦已詳蒙

前撫憲石 批准各在案西門甕城舊有營房一間派兵看守東門甕城向無片瓦半椽於是勘定地方在東甕城添造平房七間西甕城添造平房七間半共費工料錢三百四十六千文茲於十月內一律告成有事則派團駐紮盤查無事則賃商開張貿易所獲租項由齋長按季催收歸入本城

文廟捐辦春秋二祭之用庶縣城上下藉資防守而民勇不致苦寒矣合將添造卡房緣由具文詳請

憲臺查核批示立案實爲公便再此項工程民捐民辦請免造冊

報銷合併聲明除徑詳

撫

臬
道

憲外爲此備由具申伏乞

照詳施行

同治十年十一月十五日詳十二月十三日蒙

本州正堂姚 批既據徑詳仍候

各憲批示繳十二月十五日蒙

本州帖開案蒙

雁平道貴 批既據徑詳仰保德州飭候

撫憲

藩
臬

司批示繳又蒙

按察司李 批據詳已悉仰保德州轉飭該縣知照仍候

撫憲 藩司批示繳十一年正月初一日蒙

布政司張 批查此案已奉

院批另檄行知矣仰卽知照繳又蒙

布政司張 劄付十二月十一日蒙

巡撫部院鮑 批據布政司核明飭知繳等因查該縣濱臨黃河

冬令凝結冰橋值此鄰氛未靖之時防範自應嚴密今該縣於城

上下添造平房以資防守尙屬妥協茲蒙前因合亟行知爲此仰

縣官吏查照

院批事理卽便知照毋違

雜述

古帝王命將親征惟告廟社告先師者自我

聖祖始康熙二十七年厄魯特部噶爾丹犯漠北蒙古喀爾喀於是喀爾喀土謝圖等三汗部落數十萬衆盡棄牲畜帳幙分路東奔投漠南款關乞降

上命尙書阿爾尼等發歸化城獨石張家二口倉儲並賜茶布牲畜十餘萬以贍之暫借科爾沁水草地使遊牧二十九年噶爾丹東犯六月下詔

親征以噶爾丹勢熾旣入犯其志不在小且喀爾喀不可使無故地遊

牧也出古北口撫遠大將軍裕親王福全爲左羽翼與賊戰於馬
蘭布通賊數萬陣山下依林阻水以萬駝縛足卧地背加箱塚蒙
以濕氈環列如柵謂之駝城我師隔河以火器攻之遂破其營賊
越大磧山宵遁八月班師明年

駕出塞於獨石口外多倫泊受喀爾喀各漢台吉之朝以其三部爲三
十七旗建彙宗寺以安其刺麻三十三年噶爾丹侵掠喀爾喀益
甚且害我使臣三十四年率騎三萬入寇明年春

上復禡牙親征由獨石口出中路赴瀚海而北率兵趨克魯倫河手繪陣

圖指示方略噶爾丹登北疆納蘭山望見

御營大駕拔營宵遁克魯倫河者起車臣汗西界東北近黑龍江橫亘
瀚海東北二千里乃內外蒙古之界也

上初意賊必扼河拒戰及是知賊已破膽

親率前鋒追之三日至拖諾山不及而還大將軍費揚古統西路兵邀
擊於昭莫多地斬數千級馬駝牛羊器械無算並殪其可敦阿奴
可敦者準部稱其汗之妃也願督敢戰披銅甲佩弓矢騎異獸似
駝非駝精銳悉隸麾下至是亦斃於礮鳴爾丹以數十騎遁捷奏
至命費揚古留防科圖護喀爾喀遊牧

上親撰銘勒察罕拖諾山及昭莫多之山而還次歸化城輟膳大享士卒

獻厄魯特倅彈箏笳歌者畢集有老胡工筍口辯有膽氣兼能漢語

上賜之潼酒使奏技歌曰雪花如血撲戰袍奪取黃河爲馬槽滅我名王
兮虜我使歌我欲走兮無駱駝嗚呼黃河以北奈若何嗚呼北斗
以南奈若何遂伏地謝

上大笑六月駕至京師九月駕再幸歸化城駐蹕鄂爾多斯初噶爾丹自
破喀爾喀後戀漠北地久不歸其伊犁舊部落盡爲兄子策妄阿
布坦所并至是

上諭青海諸台吉與策妄阿布坦協擒噶爾丹並攜其黨與噶爾丹盡喪

羽翼遣使詣行在探中國意

上以待喀爾喀例招撫之車駕旋京師而噶爾丹倔強卒不至三十六年

春二月

駕復渡黃河幸甯夏命馬思哈費揚古兩路進兵噶爾丹窮蹙遂仰藥

死

上自甯夏循賀蘭山出塞而費揚古以噶爾丹自伏天誅奏所部盡降拓

喀爾喀西境千餘里勒銘狼居胥之山而還朔漠平垂京師御門

受賀親撰碑太學

聖祖三駕親征一由東路在盛京西界再由中路至拖諾山臨河套二千

海山縣志 卷八
里三由西路歸化城度漠北出甯夏至賀蘭山邑人談塞外事者
多未得實因識於此

俗傳娘娘灘以漢薄太后被貶居此得名考漢書薄姬生文帝年
八歲立爲代王自有子後希見高祖崩諸幸姬戚夫人之屬呂后
怒皆幽之不得出宮而薄姬以希見故得出從子之代爲代太后
非貶也漢都長安由長安入代北渡黃河路或經此故邊人立廟
祀之歟

舊縣城南有崔府君廟按府君名珽字子玉唐貞觀中賢良授長
子令以牒攝虎至服罪又逸史載長子民有朱姓者一夕被一黃

衣吏追至陰府見府君鞞之受杖此或世俗神異其事而廟祀之歟

曲峪村有二郎廟按元史文宗至順初封秦蜀郡太守李冰爲盛德廣裕英惠王其子二郎爲英烈昭惠顯靈仁裕王史記河渠書蜀守李冰鑿離碓避沫水之害穿二江成都中溉田萬餘頃此李氏父子所以見祀之張本歟

沙泉驛東行數十里地名柳河隸五寨縣官道南有隆然高阜積土如大塚相傳爲常忠武墓考明史常遇春拔開平元順帝北走追奔數百里師還次柳河川暴疾卒年僅四十賜葬鍾山原給明

器九十事納諸墓中追封開平王謚忠武今柳河川大塚蓋表其遺蹟也

明史藁載艾萬年米脂人由武學生從軍積功至神木叅將崇禎四年從曹文詔復河曲擢副總兵遭疾告歸上疏言臣仗劍從戎七載復府谷解孤山圍救清水黃甫川木瓜十一營堡轉戰高山設伏河曲有馬鎮虎頭巖石臺山西川之捷疏中陳撫勦事宜帝深嘉之尋授孤山副總兵戍平涼力戰死之又有虎大威者榆林人本塞外降卒勇敢嫻將略從軍有功累官山西叅將崇禎三年冬從總兵官尤世祿擊王加應於河曲力戰被傷賊高加計據岫

嵐四出剽掠追至忻代山中加計馬上舞三十筋長槌突陣大威射殺之進總兵官身經數十戰卒死王事論者賢之

宣城施愚山先生之孫名璪號隨村有詩稿與愚山文集並傳於世其集中有清明日沙泉道中詩云寒食今朝是天涯路尙賒無從問楊柳徒爾飽風沙酒貫真何處詩成祇自嗟遙懷生入事愁絕起悲笳集中又有忻州上陽堡廣武城雁門關諸詩蓋由忻州至定襄必經沙泉驛邑近塞苦寒清明時節楊柳尙未全青邊地又多沙風詩中所云蓋真景也

河曲歲試赴岢嵐州科試赴窰武府邵陽車望亭刺史守保德時

建試院請學使者至士子至今稱便

邑廣文李公名培根介休人工詩時李青圃先生從之學有和青圃茂才冬夜讀書詩云料峭寒飈透薄帷青燈黃卷夜分時蠶絲義蘊茫無緒虱貫工夫半在思四壁清風留欸久一床明月伴眠遲蕭然不覺吟懷發吮筆重賡幼婦詞

趙邑侯名廷澍四川人嘉慶十七年權縣事歲大饑民多劫奪市中糶米者白晝被搶莫敢誰何侯微行城市鄉村廉得其狀捕渠

魁治之衆情帖然有無賴子兄弟衆呼攔城虎攔街虎橫行邑中侯捕獲予以大杖令荷校遊於市羣無賴遂斂跡勤於聽訟每日

坐堂決事觀者如堵

衛淇園先生爲河曲學官時以河陰書院久廢清理經費爲義學條規擇師課之每與人言塾師訓蒙關係甚重秀才爲塾師教人者也學官爲訓導教秀才者也多教出一好秀才則多得一良塾師矣此言深堪敬服

邑中山坡謂之梁地沙瘠之士皆以垆計俗以三畝爲一垆查國初近畿四百里內有圈地之制戶部遣官同有司於所至村莊相度畝畝兩騎前後牽部頒繩索以記週四圍而總積之每圈共得幾百十垆每壯丁分給五垆垆六畝垆者特一繩之方廣其法捷

於弓丈也今邑人以三畝爲一垧不知始於何時然相沿習慣論地止以垧計沙瘠之土約略計之殆不必論畝數

俗以兩手量物徑其長曰一托考字典廣音託兩腕引長謂之度又布長一匹以三分之謂之勾勾三股四之說也河曲市斗大於官斗市斗七升當官斛一斗市量七斗卽官量一斛也

集詩

金

謁禹王廟

刺史
梁襄

波涵九域民爲魚帝奮忠勤親決除水澗茫茫盡桑稼萬世永賴
功誰如功高受享宜宏久廟貌千方無不有砥柱神靈最偉奇會
稽血食非隆厚火山所建在空山庫殿短廊纔數椽遊人欽謁多
題字祭祀禮抄犧樽間洪惟帝道崇勤儉此郡民繁地磽險辛苦
耕耘衣食粗乞福孚佑無令歉

元

題天橋子

河東王思誠
僉事

按轡臨深喪客懷神功鑿破石崔嵬橋頭駭浪翻銀屋峽口洪波
瀉玉杯飲瀾虹盤千尺影礮崖龍起半空雷阿誰窮得河源處不
盡濁流滾滾來

明

自河曲過保德時殘寇孛來同等爲患道中有感

侍郎都
御史楊璿

隴州南去定羌城觸目風烟感客情山勢迢迢通絕漢洄流屈曲
繞連營居民到處疲窮寇戍卒頻年困遠征何事元戎賈車騎不

教千里一塵驚

過河曲

兵部
侍郎失名

山路崎嶇溝澗多此心競業畏蹉跎玉蹄鐵勒高低步白雪黃沙
上下坡上屋不聞雞犬叫人家猶恐寇戎過那堪回首寒天晚又
報烽烟起北河

過樺林等堡

前人

北出長城小徑斜崇墉數仞渺平沙蕭蕭麥隴邊戡業寂寂柴扉
戍卒家石澗幽泉晨飲鹿營門殘柳晝啼鴉夕陽暫向郵亭宿笳
鼓聲沈士不諱

和前韻

繪事
中 王 繪

山色參差曲徑斜眼前無地不吹沙
石堆營壘兩三處雲鎖柴門
四五家花向春飛啄野鳥柳含烟舞引昏鴉
邊頭冷落獵纛帳刁
斗聲沈夜不諱

和前韻

前 人

八角南來日未斜雨餘風靜少塵沙
旌旗整整三關隊禾黍與與
百姓家政善山嶠無噬虎刑清庭樹有鳴鴉
民安卒習真長策却
虜從容自不諱

詠黃河

總兵都
指揮 曹 雄

河源發崑崙奔流漸洪大幾折經林胡環繞似雜帶滔滔無停波
奇觀此其最仙槎杳何許事謬心可會惟冀瞻一清潤及九州外

題倒廻谷石橋

前人

谷口隘來往駕橋傍崖隈勢凌雲漢表宛然箕斗陪河流動鰲影
遊魚時驚猜如何鄭相謀不及金僧材我非題柱客乘興暫徘徊
午日過河曲思親有感

巡撫
劉文謨

高堂望八賀筵開遊子天涯未擬回目斷孤雲雙淚落夢殘明月
寸心摧菖蒲強薦催詩酒角黍翻縈弔古懷豸繡煌煌登壽域不
知喜懼向誰裁

過石梯

前人

巍巍高起古城西石磴峻嶒百丈梯積雪澌巖妨馬躍剛風泊岸
意猿啼界分秦晉咽喉小地接羌胡草木低世路傾危今若此令
人按轡苦悲淒

倒迴谷

前人

激斷雲根路未通憑虛百丈卧晴虹危欄剝落寒烟裏殘刻荒涼
野草中幾曲嶙峋迴上一泓碎泮轉西東是誰假手鑿龍骨使
我驚心惱化工

登石梯隘口

平陽府
同知 劉崇儒

黃甫川頭紫塞陰，漫憑登眺滌煩襟。
千重山色開圖畫，萬里河隴自古今。
秦晉封疆歸眼界，華夷烽堠列雲岑。
抽遊勞謾成何事，空負桑蓬屬望心。

題河曲八景

教諭 郭處靖

河曲城連陝右邊，山川形勝自天然。
天橋浪響知時雨，陽沔封冰大有年。
光生廻谷千年火，彩出朝陽百尺烟。
鐘鼓遙連綠水外，翠峰山際白雲巔。
今將佳景吟成詠，故寫新詩續後編。

傳聞父老十
二句今失記

不全

送春歸一絕

教諭 郭孔恕

汾州府志 卷八
送春春去幾時回綠暗紅稀獨倚臺解得乾坤流轉意明年早探
柳梅來

喜雨

前人

借地爲壇瓦土升皇穹默鑒悃誠傾遙峰奄忽生雲氣卓午滂沱
聽雨聲萬物流蘇秋有望四民安堵樂無驚感通我爲昭公政絕
壁高鑄萬古名

由偏關至河曲營時趙憲副林副將同在

山西
巡撫 魏允貞

鳥道檐帷盡日攀晚來呼酒一開顏黃河分領華夷界紫塞前驅

文武班勞劇幾年增白髮功名何日返青山却輸范蠡先機在湖
上扁舟一夜還

明日再用前韻

前人

雄圖表裏借河山五見秋風未得還新命又來丹鳳闕孤臣愁老
玉門關華夷互市渾如約水旱連年未破顏借問腰間花是帶何
如膝下衣爲斑

林副戎八載防冬

侯維賢

紫塞冰堅虜馬過將軍遣戍守黃河迢憐寒夜嚴刁斗不比春明
散玉珂衰草連沙昏落日凍雲帶雪擁平坡八禩勤勞誰似者功

成豈是報溇沱

舊誌簡篇不全文與詩尤多殘缺右三首檢閱斷簡得之

冬月卽事

太原府
通判 王 禎

雪色連天蹊徑迷眼前景物總淒淒
四郊白草霜中委數抹青山
鳥外低路轉羊腸藏故壘
風來馬首度征輦殘冬斜日傾危
道厭聽投林野鳥啼

過灰溝營等堡

前人

昨日西行今日東夜濡霜露晝啣風
心關饋饌如燃火馬走山川
類轉蓬晚節有情思辟穀當年失計
效屠龍君恩無際應難報誰

把勳名上景鐘

觀山頭野雲

前人

放出蒼茫島嶼間，微風拖影度河關。
幻成象跡山腰斷，散出魚鱗水面斑。
暮雨歇時知入夢，朝暉凝處解添顏。
由來不識通元趣，也伴高人盡日閒。

又題

前人

擘絮細縕出岫微，一團靈氣抱魚磯。
巖頭有跡成蒼狗，石上無心挂白衣。
廣野雨餘來自去，空山風靜住還飛。
終來應慰黎元望，敵作商霖徧九圍。

至天橋峽口

前人

迢迢一派自天來，濤浪聲傳出地雷。
千丈渾流無晝夜，何時雲影見徘徊。

中秋待月

正德間書於灰溝營

山西參政劉澤

月落蕪城暗雲深，桂魄藏山河迷舊影。
星斗爽餘芒極目，登梯望空懷擁彗狂洗天風雨急萬國仰清光。

題翠峰山

奇嵐州舉人任維芳

層崖峭壁水雲鄉，遠峙城南古道傍。
橫斷殘碑山作主，清虛老衲

衆稱龐參差佛殿雲中現，隱顯胡○○○何日故園歸白首分

明此處足徜徉

過天橋子詠黃河

太原
同知失名

黃河東去水迢迢雲捲雷奔浪湧潮兩岸高山成地險半灘橫石
號天橋勢凌三峽源流遠名冠百川氣脈饒謾爲應期清始現於
今玉燭四時調

登北極臺

兵備
道王 遜

北望朔雲氣鬱陶天風冷冷動征袍崇臺雄據山河險犬馬期舒
聖主勞 築臺自余始故云

詠河曲八景

應天府
府丞 苗朝陽

火山光焰景偏奇烟吐朝陽洞口迷大澗波濤鐘鼓韻翠峰雲擁

堞樓低水封陽沔農千畝濤怒天橋雨一犁橫亘中流神禹蹟雷
聲水湧午風吹

登石梯門樓

前人

瀟瀟朔氣滿邊陲一線黃流擁戍樓莫訝重關嚴鎖鑰關河東北
是神州

再遊石梯樓

前人

山下黃河河上樓河聲山色滿樓頭盈盈天塹華夷界緩緩人橫
秦晉舟躡屐穿雲凌峭壁揮樽落日暗沙洲欵關誰復恢河套悵
望芒芒白草秋

再用前韻

前人

塞草離離繞成樓樓臺倒影枕邊頭
函關氣靄真人轍易水歌停
壯士舟撫劍雙橫摩碧漢掀髯一嘯俯滄洲
太平不事金城略寸
二屯荒滿目秋

望見太子灘

前人

荒灘縹緲暮雲隈昔日何如今草萊
千古滔滔灘外水夕陽影裏
斷鴻哀

失題

前人

幾見將軍膽氣雄驕胡百萬敢當鋒
至今虹映黃河水猶似當年

血戰紅

火山

前人

愛山不禁意婆娑此景窮邊有幾何
天未補時曾煉石日將沈處漫揮戈
削成峭壁光浮壑曲抱洪流金漾波
幾憶當年鑽燧氏何勞四季費鑽磨

春日借侯尚志李如柏遊科村

前人

綠陰深處蔓藤蘿寂落荒村感慨多
惟有東來澗底水春風不改舊時波

寒食前遊火山

知縣

毛似徐

陽燧藏幽谷陰崖發突烟河疑龍護鏡山迥太華蓮絕粒猶餘爨
燒丹不計年虛堂真火出莫說獨溫泉

清

順治戊子秋闈校歸過陽武峪寺和范伊蒿同年壁間韻

知縣

馬雲舉

共此窮邊吏淒淒蕭寺經嶺頭沙意白樹杪葉刪青歸雁南來字
寒砧北地鈴浮漚今已徹宦影醉禪馨

次韻贈苗淩漢先生自河曲見訪

攜所著
明經錄

魏象樞

大道久榛棘餘姚倡良知良知何由致求仁平且時傳說日紛亂

格物謂支離我讀明經錄豁然釋前疑考亭貴窮理古今甯外茲願言敦踐履方寸有餘師

丁未夏大旱邑侯田公命曰少尉詣榆泉村禱於三聖廟
故爲雨祀者凡禱無不應然遲之數日或旬餘方雨未有
禱之速應如響者是殿也朝詣神祠暮卽沾雨誠一時快
事故喜爲賦之

解州
學正 苗敏榮

邊塞時當夏麥禾尙未起况逢久旱時枯荻且將死結土病犁牛
秋苗患不籽霾風盡日揚耕者半途止堂上驚神君念民何所恃
前村禱神祠爲民祈福祉問問白衙官勞績多可紀同此愛民心

救焚憐赤子速馳請雨來以爲吾亭喜昭格道無他上誠而足矣
衙官御命趨率屬向神跪化楮致哀辭投瓶接聖水水盈得五分
知神默已許役夫昇聖行途遠廿餘里耆衆爭息趨衙官隨步履
匆匆畏弗虞曷敢高其趾聖像乍臨城雲油自西始神君步禱迎
香供潔陳祀大雨暮淋漓徹夜猶未已夏禾固淳然秋種蕃糜芑
農叟盡歡呼紳衿咸頌美若功歸在天未禱胡爲否一禱雨滂沱
功非無所以神君德有孚良佐勝任使獲應快生民口碑香頌齒
因時歌盛事書誌貽青史

東郊遣興和劉履和茂才韻

知縣
楊廷芳

郊坰何事最堪誇，滿眼芄芃未黍嘉。
誰以賭棋陪謝傅，不將博物鬪張華。
乾坤日月林中鳥，身世勳名水上槎。
簿領暫拋聊載酒，回看西塞夕陽斜。

登摩天嶺

在岢嵐河曲之間

訓導

李培根

峻嶺碧摩天，登臨意曠然。
目窮沙磧外，身到塞垣邊。
黑子山城小，黃河石澗穿。
白雲親舍在，立馬萬峰巔。

同諸生遊海潮菴

訓導

郝廷棟

重來勝地訪清幽，乘興先登萬法樓。
佛隱雲龕嗔復喜，寒生古洞夏疑秋。
山花雜沓迎門放，澗水縈紆繞寺流。
識得冠童風浴意，不

妨便作舞雩遊

道光戊子秋闈校歸旅次步馬嶠輪韻二首

知縣

曹春曉

花甲剛三匝科仍戊子經揮鞭凌霧紫閱卷憶燈青理悟禪林鉢
聲傳驛路鈴重簾瞻已遠猶靄桂枝馨

分枝殊今昔蕭齋往返經心從平處白錢自選來青皓皓山腰月
悠悠殿角鈴留題人不見佳句勝蘭馨

烈婦許來祿妻楊氏詩

前人

扶輿淑氣鍾奇節所天一失心如雪金釵肯易棺與衾螟蛉羞亂

骨與血繫頸不負繫足人驚鳳一雙葬邱垤截耳割鼻猶愛生殺
身成仁真爲烈

過火山 宋時建軍處

前人

濱河山起勢絡繹衆山皆青一山赤枯茲持向空中投覺有輜烟
出罅隙崖邊有路土兼石高逾千丈濶逾尺征人下馬樞衣行一
步一折汗盈額登來眺望凌層雲聞說山中曾建軍野老不知建
軍處山頭山腳咸耕耘

重到西草地

草地農民類居山窰過小溪七十二道至十里長灘是蒙民交易之所在也故內爲黃界外爲

黑界

前人

莫嫌草地最荒涼亦便農民亦利商山洞重重排兔窟溪流曲曲繞羊腸市臨雲水通中外界指風沙判黑黃聽政不因蒙漢異

熙朝雨露本無疆

課士

前人

琴閣清和鎮日開絃歌聲起古熒臺宰官時爲觀風出多士何妨問字來欲藉文章覘器識要從庠序育英才隩林種得新桃李好與甘棠一例栽

勸農

前人

饗餼攸賴在深耕望爾閭閻盡遂生欲向倉箱謀積聚先將黍稷

海山縣志 卷八
藝縱橫灌來自合分高下耘去無須問雨晴即使天年豐歉異能
勤定可卜西成

道光己丑秋省親假滿回閩省侯官縣任過沙泉題壁

浙江杭
嘉湖道 黃宅中

鞭指寒烟驛路深馳驅獨繫梓桑心雲方出岫將爲雨鳥乍辭巢
故戀林四壁蟲聲秋唧唧一燈孤館夜沈沈昨宵際會猶親舍咫尺
尺家山夢易尋

捐修河曲縣志告成

曹春曉

隴州舊志幾篇留文獻攸關及早修亮節遍從閭閻訪幽光勤向

草茅求事多沿革經時久猜爲增刪歷歲周梨梓但捐廉俸薄施膏何忍歛荒陬

娘娘太子灘

城北二十里河中大灘周圍五頃種麥納軍租相傳漢呂太后貶薄太后及文帝居此至今農

民鋤得古瓦有萬歲富貴字可作硯東時尙有一小廟夏秋多鳧雁之屬道光辛卯四月赴西草地過此

前人

黃河迤邐渺無端忽向中流露兩灘麥穗連雲迷雁字楊花墜雪
冒魚竿平安慣引扁舟渡富貴時尋片瓦刊太子娘娘看不見至
今猶說漢宮殘

道光辛卯七月卸河曲任

前人

濡墨陳情印綬辭雙親年老幸齊眉匏懸已歷三年久瓜代剛逢
七月期用節不嫌囊似洗膏屯敢冀口成碑歡承菽水依桑梓葵
藿依然向午曦

過長城

前人

袖滿清風過翠微山光留戀若難違蒼生自有長城倚梓里何妨
任我歸

白星聯監修文廟落成賦贈

訓導 衛浚都

俎豆先賢歲月頻黌宮幽草愴人神憐君善搆空中閣

修工袋米
頗費周張

有婦能勞爨下薪

婦躬炊以
食役者

薜荔芟除牆露角琉璃比次瓦成鱗

巍然廟貌仍如舊誰識經營費苦辛

留別河曲諸生二首

前人

三生石上續前因聚首元亭笑語親
博士官卑嘲進學先生厨冷
喜傳薪驚心鴻爪尋殘雪努力鶯遷愛
晚春莫道宦囊羞澀甚好
將清白答

楓宸

斯文一脉喜追尋七載論文訂素心
問字虛懷通絳帳傳衣舊業
託金鍼相期鵬翅翔雲路喜見鴟音戢
泮林器識須先文藝後格
言留與作箴銘

水井村

黃宅中

洞鑿巖阿險橋通石路平
塞河圍寺古泉水在山清
梵宇樓臺靜禪林歲月更
舊時僧種樹高柳長都成

石梯隘口

前人

長河如帶束峰腰峭壁劖開路
一條古刹日高崖轟轟邊牆秋冷
草蕭蕭臨流禹蹟千年紀對岸
秦山萬笏朝石磴盤紆霜徑滑到
來愁說馬蹄驕

登挹青樓晚眺

前人

萬家烟靄氣氤氳郭擁晴暉對夕曛
邊外春歸新草木社前人賽

舊榆粉河流一線穿秦塞地壯三關接代雲猶有長城存故蹟當年曾建火山軍

醉果

果如山楂土名海紅子浸以燒酒貯罌中旬月色香味俱勝

前人

秋林小摘采盈筐酒浸瓶罌味更芳自耐寒酸經醞釀記從園圃飽風霜堆盤磊落雞心赤出甕圓勻馬乳香鄉里小兒紅上頰啖來渾似醉檳榔

冰魚

前人

水產能充土貢饒鯉魚冬月出天橋誰拋玉尺離珊瑚合薦冰盤佐酒瓢衣解玉祥寒自躡筒盛杜孝取非遙懸庭定許標清節

政頭衙署一條

禹蹟

廩生

任臨汾

浩浩西來接太空成平萬古慶攸同界分秦晉重關奠地限華夷
兩岸通四載寅承欽帝命八年辛苦緬神功天橋遺蹟今猶在廟
貌如新亭祀隆

翠峰羅漢

前人

石壁凌空坐列仙幾生修到脫塵緣丹成縑嶺看揮手錫挂洪崖
笑拍肩柳眼開時超十二龍睛點就小三千今朝拾級登高嶺依
舊曇雲帶曉烟

碧嶂觀音

前人

峭壁懸崖鎖翠嵐，誰攜玉斧鑿神菴。
低流曲水浮清碧，高插長空接蔚藍。
萬朵慈雲迷古洞，一枝仙柳覆幽龕。
崎嶇莫辨歸來路，回首真人笑指南。

洗心洞高

前人

古洞清幽鑿翠巒，竊泉聲浪互瀾漫。
景超塵世三千界，路險羊腸十八盤。
捲幔我疑天上坐，開軒人向畫中看。
閒遊頓覺炎氛遠，一片雲霞渡石欄。

卧龍石秀

前人

危巖疊疊石嶙嶙共說神龍仰臥頻爪跡支撐伸復屈晴光隱約
舊還新斜陽照處金鱗閃細雨零時玉角真何日風雲曾會合翻
身直上九重春

飛泉挂壁

前人

百丈峰頭珠錯落千尋巖下雪紛飛風來震靈聲初勁雨後下東
韻轉微彷彿龍梭高挂壁依稀白練倒流輝乍看不覺征袍濕只
道前宵露未晞

捕寨凌空

前人

保障高橫巨壑中依山面水鑿蒼穹巉巖不減車箱險突兀還如

劍閣雄匹馬飛攻迷左右偏師夜渡失西東孤峰獨占金甌固天
塹由來出化工

古甯玲瓏

前人

窟不營兮楠不鏤天然石罅鑿深幽金臺聳翠凌霄漢玉壘飛青
接斗牛伴我烟霞穿戶牖可人花鳥繞簾鈎境真卽是嬾媿地何
口張華到上頭

太湖淼漫

前人

崩劣山前湖水清遊人宛向洞庭行一輪明月波心動四面奇峰
鏡裏呈暮雨翻濤吹鼓韻晨風拍浪送鐘聲臨淵靜悟寰中理逝

海山縣志 卷八
者如斯本至誠

遊羅漢洞

汾陽縣
教諭 張元恩

欲尋幽境下重巒絕壁峻嶒展步難入洞人從巖下出開門山在
畫中看泉飛碧水雲間響樹有靈根石上蟠獨愛洗心存古蹟
衣將去且盤桓

遊搗青樓

稟生
周際亨

百尺層臺一洞天遊觀直上兩峰巔城樓影射邊樓影秦界烟通
晉界烟帶繞黃河魚在藻花開紫塞鳥窺蓮當前卽是蓬萊境誰
摘星辰到月邊

張星樞明府宰河曲三年仁聲藉藉成豐甲寅夏亢旱禾苗
幾枯萬衆惶恐公設壇求雨每禱輒應雨澤旣足人心乃
安咸以爲公之實心愛民所感也因爲俚歌以紀之

保德州
進士張兆魁

民依百穀穀仰雨皇天不雨民氣瘡不有至誠能格天萬衆何以
慶生聚甲寅之夏久徂陽旱魃爲虐勢猖狂金可銷流石可鑠敢
言黍稷毓馨香夏麥未熟黃已多秋禾初長奈若何五日不雨將
無麥十日不雨則無禾嗷嗷赤子延頸企燃膚灼體徒勞耳亦知
不雨雨無期仁人豈忍視民死嗟我張公民所怙今之杜母與召

父民呼父母公呼天心香虔蕪輸肺腑天人感應理無訛頃刻濃
膏降滂沱始爲優沃繼霑足一雨再雨民抃歌咸以生成歸大德
粒我蒸民乃爾極公聞此語且皇然天功不貪爲己力於戲最績
江陵傳反風滅火曰偶然扶風作亭名喜雨讓德不居太守賢大
抵古今稱惠人不愛虛譽守其真入於公兮碑在口我於公兮願
無垠願如郇黍膏雨露不爲瀦澤爲甘澍試看大旱霖普施萬彙
回春皆布濩

同治丙寅秋日登挹青樓遠眺

知縣

金福增

一曲琴彈訟罷聽秋風匹馬此間停關開爽氣遙迎紫樓聳層霄

遠挹青百里河山通朔漠萬家烟火集郊垆於今誰挽狂瀾倒仁
壽咸登頌德馨

沿邊自昔號巖疆石棧天梯驛路長走馬坡前沙似海釣魚磯畔
水爲鄉青泥古道盤晴靄紅樹秋山隱夕陽何日蓴鱸歸去好二
三父老話農桑

丁卯春日登北極閣遠眺

前人

北天雄鎮峙巍峩廬舍田園抱郭多隔岸童山無綠樹出城官渡
是黃河一年似水流鶯囀百貨如雲瘦馬駝琴韻花光人散後憑
欄來聽打魚歌

繚繞爐香結篆浮嬉春士女盡來遊疎檐鈴語沈還響滿寺鐘聲
閣不流處處烟霞歸眼底家家憂樂到心頭故鄉饒有湖山美觴
詠蘭亭記得不

戊辰重九日偕趙研雲同年錫泰登河曲北極閣卽景聯句

成五十韻

直隸清苑

金鍾彥

縣舉人

同作龍池客登高結伴遊河分秦晉界城接水天秋崖斷泉仍剉

彥

山童樹不稠西陲環雉堞東道畫鴻溝烽火經年逼烟波到處

愁笳聲喧甲帳

泰

鞭影速庚郵邑本臨流峙邊宜借箸籌鳩工勤

版築嚮至荷鋤耨

彥

國士紆奇策

泰

元戎煥壯猷乘墉勞膂力設

陔控咽喉榆塞軍初振蘭防武是謀彥淨除殘鼓角泰齊唱大乃

驪臺彥欣傳騎詩盟喜狎鷗三關迎紫氣一曲枕黃流漁驪晴川

繹人呼晚渡舟涼颭隨浪捲彥薄霧滿岑收碓杵家家急琴樽事

事幽泰鐘敲頻過耳帆轉快疑眸彥怯冷蟲居壁泰驚寒雁宿洲

裏糧爭載筏彥垂餌笑披裘泰驀起眼沙鷺常鳴入谷騶瓜壺羅

近市黍稷刈平疇彥少女能馳馬羣兒學放牛泰鶯毛縫翠罽鷹

爪脫青鞵漲已金隄褪雲曾玉壘浮彥蒼苔雙屐滑紅葉半襟兜

屋老牽蘿補泰田汗雜草修營門閒射石場圍戲拋毬寺遠遙聞

磬簾低正掛鈎雷封通朔漠星野紀并州舊雨聯吟社彥斜陽止

戍樓沿村炊早熟應節酒新篘泰絕頂供憑眺彥知心好勸酬銷

兵戈盡戢泰奮袂筆都投彥勲業空餘子功名邁列侯他鄉饒別

夢勝地發清謳目可窮千里泰胸真富九邱光陰忙蟋蟀彥身世

等蜉蝣拾級攀藤上尋碑剔蘚求泰霜威偏料峭風景尙夷猶味

有魚充饌時當鳥養羞彥泥塗軒久滯湖海轍將周製賦才誇粲

泰題糕字窘劉筵開誰落帽茶沸待傾甌興豈催租敗思還引緒

抽趨庭叨鯉對飛閣集鶯儔採菊辭重譜簪萸樂未休句從筠管

寫韻向錦囊搜蓴菜懷歸矣蒹葭寄詠不歌成看雪舞此境足勾

留彥

戊辰冬十月回匪由草地竄出沙梁十一月擾及河西哈拉
寨麻地溝古城等處遂至縣屬兼轄之十里長灘邊馬遊
奔河干意圖搶越幸彼蒼眷顧不敢履冰我邑藉以保全
實斯民之福也因吟十二絕以紀其事 金福增

隩州自昔號巖疆一帶沿邊屢築牆莫道河流多阻隔從來游牧
也須防

百里黃河幾曲灣東西對峙萬重山朔風吹到冰橋結車馬行人
去復還

往來警報又紛紛逼近沙梁滿寇氛西岸居民都避難此時還有

女如雲

終日籌防事正多
鑿冰踴躍賴人和
於今幸得難飛越
戮力同心共守河

各營列隊縱軍驕
萬古精忠魄盡銷
擊柝懸旌民氣壯
滿城燈火照通宵

忽聞邊馬到河干
鉦鼓齊鳴衆膽寒
同澤同仇詩載詠
急應調集我民團

鎗礮裝成正欲施
賊踪遠遁早無知
如何勝仗重重報
主將邀功羽檄馳

飛調雲中將弁兵遲遲不至怕長征望穿兩眼誠無益待得來時
在此行

腰間盡繫赤絲絛花布爲巾性桀驁嵩武諸軍如蟻聚河南江北
土音操

逆醜鴟張勢不窮有心窺伺我河東履冰蹈險相追逐較勝兵民
氣象雄

運籌帷幄意何求一鼓而擒五賊曾瀝膽剖心猶未足虜功迅奏
免貽羞

律轉三陽物候新干戈載戢慶長春邊陲自此狼烟息安享昇平

慰兆民

遊白鹿泉

拔貢

常允恭

何人逐鹿不知年
此地空餘白鹿泉
澗曲澄波千畝潤
源噴細雨
半山懸三村壤
錯都環水萬樹陰
濃欲罩天靜對移時
神致爽鐘聲漫度夕陽烟

過壽聖寺

宋治平間勅建
在白鹿泉村

前人

古刹相傳漢代留
原名壽聖幾春秋
殘碑斷碣尋難得
野老山僧說漫求
樓外白雲時片片
門前碧水自悠悠
誰將寺額題宗帝
直把鄉人誤到頭
山門外額曰漢宗帝古刹內額曰勅建壽聖寺

河曲十二景

增生
陶銘鼎

十二吟成勝景全，挹青樓聳翠微巔。
臨流塞紫霞烘樹，大泫峰丹日映蓮。
春水香山平地出，石城佛洞半巖懸。
占風競說黃花嶺，兆雨爭誇白鹿泉。
子母灘頭留漢瓦，陰陽池上接秦邊。
朝暎文筆河心蘸，石潤西門澤沛天。

賀金葆卿司馬六十壽

保德州
知州 姚慶布

黃河萬里入邊來，日照雄關六扇開。
戶有絃歌新治譜，地名豐樂舊池臺。
維持端賴真賢宰，興廢於茲見吏才。
瘠土今登仁壽字，喜添鶴算共銜杯。

定是寒山苦行僧。竭來道骨總棱棱。現身又闖人間世。說法毋忘最上乘。兩字清勤惟自勵。一生澹泊更誰能。龍華會裏欣君健。頂上圓光得未曾。

君自繪小影作僧伽趺坐入定狀。題詞甚佳。故云。

次前韻

金福增

風塵作吏此間來。山色河流眼界開。六載濫竽長守土。一官聽鼓早登臺。辛勞竟乏安民術。迂拙原非治世才。爲避喧囂遊佛剎。介眉莫進紫霞杯。

時在海潮菴諷經。

選勝閒尋野寺僧。輝煌殿宇上觚棱。邀來明月成三影。話徧慈雲第一乘。理欲談元渾未得。學求寡過亦何能。前生因是今生受。修

到梅花也不會

次前韻

巡檢

盧綬生

穿雲履磴拂塵來，曲徑通幽花自開。
問俗有時憐下吏，聽禪親爲到經臺。
感恩民頌龔黃績，濟世公懷管樂才。
偶訪清涼息征轡，收將山翠落瑤杯。

世味深嘗靜似僧，填胸五嶽見圭稜。
生來澹泊真仙骨，奈得虛明入上乘。
比戶歌聲新教化，傳家治譜舊廉能。
願公常譏春風帳，可許彭宣到不曾。

次前韻

王衡

慈愛原從學道來，勤施六載化源開。
仙籌迎夏頻添屋，兆姓熙春信有臺。
澤沛黍苗南國政，門儲桃李北方才。
隩林沐德深如海，獨飲豐泉水一杯。

偶學禪和訪寺僧，消融圭角不爲棱。
虎溪覓徑無雙客，獅座談經最上乘。
因了三生銷結習，才優百里頌廉能。
君身已作萬家佛，猶向如來頂禮曾。

次前韻題海潮菴壁

金鍾彥

偶向龍華會上來，深山古寺畫圖開。
穴居初建藏經閣

時方建閣
磬石爲窰

壁立猶餘說法臺

菴後有土墩高踞山頂
相傳係古時說法臺

傳戒人爭誇佛事題詩

我却愧仙才紅塵不到清涼境灑徧楊枝水一杯

愛靜如僧更訪僧圓通誰復見模稜桃源地可容常住梓里菴猶

憶大乘

余家山陰之觀仁里與大乘菴爲鄰

嘏祝斑衣歌壽豈禪參老衲驗修能良

宵鐘磬聲都徹喚醒人間夢未曾

同治辛未冬 邑侯金公議修縣誌命余輩司採訪事越明

年告竣爰作五古以紀之

廩生

周際亨

金公任邑侯歷年多善治文教蔚然興及時修縣誌吾儕處學齋
忝司採訪事搜羅每盡心曷敢參私意人品重綱常士風先識器
文章採精純景物訪奇異採訪得英賢經濟會明試採訪有名儒

品端兼學邃採訪徧編氓天真論節義採訪及闡門金石探心地
耳目豈周知所知何忍置善善欲從長一節咸登記敢云公道昭
謹凜防清議會當月且評持論協同志合詞呈縣尊鑒衡取與棄
風俗有攸關編次各從類典章制度全人物山川備紀事必周詳
述辭皆美粹可法即可傳不令斯文墜文獻至今存來茲庶昭赤